

東
華
續
錄

東華續錄

嘉慶三十五

臣王先謙敬編

臣周瀚蕃恭校

嘉慶十八年癸酉春正月庚午廓爾喀額爾德尼王吉爾巴納租
塔畢噶爾瑪薩野遣使進貢方物○辛未調許兆椿爲吏部右侍
郎以蔣子蒲爲工部左侍郎由祭酒遷○乙亥以松筠爲御前大臣罷
軍機處行走命勒保軍機處行走○己卯諭軍機大臣等伯麟等
奏檄調邊外不法之土目張輔國抗違不來見督各土司集練會
剿一摺土司張輔國卽僧人銅金原係漢奸因其悔罪投誠免其
治罪並加恩給予土目戳記令其約束所屬猓夷無令滋事乃怙
惡不悛上年膽敢勾結猓匪搶占各土司地方肆行滋擾又復縱
令猓眾焚劫土司地方是該土目罪狀昭著斷難稍事姑容自應

聲罪致討以靖邊隅伯麟見已馳赴緬甯著即在彼督率沿邊將弁嚴兵備禦以壯聲威其應給發該土司等銀兩火藥等項卽飭知該道府轉發接濟務期迅速藏擒以除頑梗各土司如將張輔國拏獲卽飭令解至內地伯麟審明後由驛速奏卽將張輔國明正典刑以彰國法○諭昨據張映漢奏遵照部文查明湖北彌補無著倉庫確數覈實辦理一摺所奏係屬誤會各直省倉庫錢糧本不應有虧缺前因各省有年遠遞虧或厯任各官身故無著者接任之員不能一時完繳諭令各督撫設法彌補每歲年終密奏一次以備查覈上年戶部奏請將各省欠款報部查覈此內如災緩錢漕及民間積欠原應分晰咨部部中覈其能否依限催徵奏明分別勸懲若倉庫虧空係萬不得已一時權宜密辦之事不可藉以爲例若部臣知有數目卽當照例參奏治罪勒追戶部原奏

未經分晰清楚各督撫若據此即將虧空數目按年報部以空言
塞責該管州縣知係已經報部之款或心生推諉亦不上緊完交
辦理轉多窒礙著傳諭查有虧空各省之督撫等嗣後仍遵照前
旨將所屬虧空認真催追彌補並於新舊交代時徹底盤查每歲
年終將彌補確數據實密奏俟奏報全完日朕仍分派大員前往
確查如有短虧情弊惟該督撫藩司是問無庸照戶部所奏紛紛
咨部徒以成報具文於彌補之法轉致有名無實也○辛卯藩江
蘇高郵寶應下游各河○壬辰諭蒙古王公等墳塋向無立碑之
例丹巴多爾濟係舊蒙古自幼在內廷蒙養經朕擢至御前大臣
一切差使謹慎奮勉著加恩准其建碑卽刊朕所降恩旨於前祭
文於後前賞丹巴多爾濟銀二千兩托恩多隨扈盛京無須如許
路費卽著將此項建碑以示朕體恤舊蒙古之至意

二月己亥朔諭百齡等奏請將新添海州揚州官兵俸餉等項槩由商人捐辦無庸移改漕標左營一摺所奏斷不可行國家設兵衛民一切廉俸餉稍悉皆支用正帑直省營伍皆然從無令民間捐辦之事茲該督等以江南海州地方私販充斥時有械鬪拒捕之案揚州存城額兵亦不敷巡緝議於該二處增設官兵夫徭私禁暴皆保衛民生之事商亦民也亦復何所區別若謂商人等自願綱引出賃雇巡丁屏禦梟販原例所不禁聽其自辦今既定制建營名爲額設官兵而令商人等捐給俸餉朝廷豈有此政體乎百齡阮元阿克當阿何陋見若此均著傳旨嚴行申飭仍交部議處汝三人俱係有才有爲之人今如此存心卑陋朕實不解至該二處如必須添設弁兵或漕標不能裁撥另於通省各營伍議撥均無不可卽江省無可改撥之處或將所增俸餉另行籌款動支

統俟妥議具奏到日再降諭旨○庚子 上御經筵○辛丑諭從
前挑選八旗女子官員兵丁閒散之女均經一體挑選自嘉慶十
一年曾經降旨令將自筆帖式驍騎校以上之女備選見在八旗
滿洲蒙古女子自護軍領催以上女子仍照舊備選外其各項拜
唐阿馬甲以下女子著不必備選著爲令○免年逾六十五歲之
蒙古王公台吉來京如遇年班赴熱河瞻覲○壬寅諭本年京察
屆期吏部開列在京各部院大臣及各省督撫名單請旨甄別朕
思三載考績爲朝廷黜陟大典自當覈計各臣工三年內功過以
示激揚見在朝政肅清紀綱整飭大學士慶桂董誥勒保劉權之
協辦大學士松筠鄒炳泰戶部尚書托津內閣學士盧蔭溥或襄
贊綸扉或趨承權禁夙夜匪懈恪勤供職均著加恩交部議敘盛
京禮部侍郎花尙阿本係棄瑕錄用之人此次任內又有失察邪

教及諱災不奏過失伊年逾七旬著以原品休致餘俱著照舊供

職其直省總督巡撫此三年內均係循分供職無可甄敘之員亦

無年老應行罷斥者俱著照舊供職○癸卯以誠安爲盛京禮部

侍郎由左副都御史遷○甲辰以果齊斯歡爲內閣學士由翰林院侍講學士遷○

丁未命 皇次子釋奠 先師孔子○癸丑以山東微山湖凌命

引駱馬湖濟運○庚申諭軍機大臣等伯麟奏埽蕩賊巢及躡緝

首惡招撫各寨情形一摺南興爲張輔國巢穴該逆恃險負固經

各路目練奮勇圍攻縱火焚燒傷斃賊匪甚眾餘匪向後山逃逸

張輔國乘夜滾巖潛遁見在各練占住南興山寨分頭接捕賊巢

業已破毀匪眾無盤踞之地張輔國由山後老林遁匿諒亦不過

在附近寨洞伯麟見將應撤兵練及時撤回責成各土司窮按山

谷著卽嚴行曉諭以張輔國係肆擾渠魁必應上緊拏獲明正刑

誅責令剋期擒獻庶可邊隅永靖○乙丑以佛住爲左副都御史

由大理寺卿遷○以朱紹會爲太常寺卿調陳豫爲湖南布政使以袁秉

直爲江西布政使由太僕寺卿遷○以梁敦懷爲太僕寺卿李長森爲雲

南布政使由江南蘇松糧道遷

三月辛未轉成甯爲吏部左侍郎以文甯爲吏部右侍郎由內閣學士遷

○轉秀甯爲禮部左侍郎以英和爲禮部右侍郎由內閣學士遷○甲戌

景斂卒以許兆椿爲貴州巡撫調戴聯奎爲吏部右侍郎轉吳烜

爲兵部左侍郎以盧蔭溥爲兵部右侍郎由內閣學士遷○轉茹棻爲工

部左侍郎以陳希會爲工部右侍郎由內閣學士遷○以高杞爲刑部左

侍郎方受疇爲浙江巡撫調素納爲直隸布政使以巴哈布爲湖

北布政使楊懋恬爲江蘇按察使由安徽甯池太廣道遷○乙亥 上親耕

藉田○丙子 上啓鑾謁 西陵○丁丑 上幸南苑行圍○以

王紹蘭爲福建布政使調遇昌爲福建按察使山甘調○壬午免經
過地方額賦十分之三○癸未諭軍機大臣等百齡奏確勘仁義
禮三壩必須移建一摺並繪圖貼說朕詳加披閱當卽召見扈從
之軍機大臣及松筠指畫商酌山盱五壩爲宣洩洪湖盛漲保護
堰工而設康熙年間靳輔原議建仁義禮三壩乾隆十六年 皇
考高宗純皇帝特命添建智信兩壩迄今歷有年所地形水勢自
必斟酌盡善今該督等奏稱仁義禮三壩近年屢經開放衝跌壩
基損壞刷成深塘難以修復卽修復亦難經久擬於蔣家壩以南
附近山岡之處移建仁義禮三壩並挑挖引河三道儘先改建仁
義兩壩將禮壩地基築作草壩以備本年宣洩計需費五十餘萬
兩等語仁義禮三壩旣不能就原處修復該督等斟酌情形奏請
移建但詳閱圖內舊壩之下所繪民莊相距甚遠見擬移建之處

界畫引河三道兩旁民莊鱗次則其閒田畝廬墓自必繁庶所穿引河淺狹水必泛溢若挑挖寬深恐所傷實多其舊有三壩旣不開放則與堰隄無異必須填砌切實與石隄聯爲一體方足以資捍禦隄頂處所並應添建鋪房派駐弁兵防守方可保無疏失合計各項需費恐該督等所估銀數以之興辦尙不敷用事關謀始不可不詳細酌覈朕意或於蔣家壩地方先行改建一壩來年試爲廢放若水勢順利足以消滅盛漲並於附近田廬無傷再議續改二壩著該督等再行詳議是否可行並通計引河寬深丈尺若干另行籌度繪圖貼說具奏再降諭旨○丙戌 上謁 泰陵 泰東陵至 孝淑皇后陵奠酒回鑾○庚寅以黑龍江吉林遣犯眾多命嗣後俱發新疆○甲午 上閱健銳營兵○丙申 上還京師

夏四月戊戌朔伯麟奏張輔國就擒餘黨悉平○己亥以色克精

額阿隆阿王鼎吳璣俱為內閣學士

色克精額由太常寺卿阿隆阿由二等侍衛王鼎由詹事

吳璣由光祿寺卿遷

○王子諭春秋傳稱龍見而雩考古雩祀權輿於此乾

隆七年議於孟夏龍見擇日行

常雩禮其義以蒼龍宿見東方

則為百穀祈膏雨占星之法總以節候為準非以孟夏朔日為斷

也比年欽天監所擇日期在立夏節前後不齊殊於古義未協嗣

後 常雩大祀著欽天監定於立夏節後數日內蠲吉行禮其立

夏節如在三月以內則擇於四月初行禮著為令其明年 常雩

大祀期著欽天監查明如原定在立夏節以前即改擇吉日奏准

頒行○甲寅

上詣

黑龍潭祈雨○己未

上詣

天神壇祈

雨○庚申命五城設廠平糶○辛酉

皇后行躬桑禮○命刑部

清釐庶獄○以書敏為盛京兵部侍郎

由左副都御史遷

○癸亥以富俊

爲黑龍江將軍廉善爲盛京工部侍郎

由內閣學士遷

五月丁卯朔諭軍機大臣等百齡等奏遵旨議覆移建山旰仁義禮三壩一摺山旰仁義禮三壩近年疊經啓放跌塘過深計有三四丈不等勢難修復自不能不議改建蔣家壩地勢高亢偏近山根土性堅實壩基可期穩固新挑引河仍可歸舊壩引河宜洩於該處民居亦無妨礙著卽照所請改建本年先將義壩建石壩一座挑挖引河一道並將仁壩地基先行盤作草壩挑出引河以備宣洩盛漲所有趕作壩工務須於大汛前一律辦竣引河尤須挑挖寬深俾水勢無旁溢之處如本年節宣得力則三壩分年遞修可以永資保障至舊壩旣不開放尤須填砌堅實該處爲歷年水勢所趨經行已熟且外有數丈深塘根腳不固必須夯礮結實使與石隄聯爲一體大汛時尤須多派弁兵不分晝夜住宿防護勿

稍疏懈是爲至要○庚午 上詣 黑龍潭祈雨○甲戌以瑞麟

爲福建按察使

由山西雁平道遷

○庚辰 上詣 社稷壇祈雨○壬午

封未婚守志貞勤綿懃女爲節義縣主○戊子賜直隸輸貲助賑

廩生齊如鑲舉人○己丑以英綬爲內閣學士

由鑲堡使遷

廣泰爲左

副都御史

由通政使遷

○辛卯截留江西漕米十萬石分賑直隸河南

山東旱災○壬辰雨○乙未復滿洲蒙古旗人應武鄉會試例

六月丁酉命每年春秋致祭密雲縣 白龍潭神祠○甲辰申禁

宗室覺羅與漢人爲婚○乙巳增設直隸大沽管都司海口營守

備各一○丁未諭戶部具題更換左右翼監督已另行簡派矣數

日前文孚於召對時面奏伊才短不能照料若俟題本後卽不能辭免

擬之期恐令其接管伊才短不能照料若俟題本後卽不能辭免

爲此先行密奏乞恩懇請免其接管等語殊屬非是人臣阻勉奉

公事無難易惟君所使若意在趨避遇事之稍涉煩難者卽豫爲推卸設彼此相率效尤甚乖敬事之道此風斷不可長况密奏爲公則可爲私不可文孚述似小心實則膽大文孚著交部加等議處尋降四級調用○壬子以穆克登額爲刑部右侍郎由副都統遷○

癸丑以直隸順德等三府旱撥奉天倉米二十萬石截留湖廣漕米五萬石備賑○乙卯諭朕敕幾餘暇披覽往籍見宋范祖禹所

著唐鑑一書臚敘一代事蹟考鏡得失其議論頗有神於治道宋

平五代之亂近接有唐其政教風俗厯厯可稽故以唐爲殷鑒我

朝紹膺大統道揆治法遠述百王至有明三百年時代相承其一

朝政治亦鑒觀得失之林也宜倣唐鑑體例輯爲明鑑一書臚舉

大綱蒐採編次其論斷卽令派出編纂諸臣輪流撰擬進呈後經

朕裁定勒爲成書刊刻頒行用昭法戒○庚申諭生員鮑廷博於

乾隆年開恭進書籍其藏書之知不足齋仰蒙 高宗純皇帝寵

以 詩章朕幾暇亦曾加題詠復據浙江巡撫方受疇代進所刻知不足齋叢書第二十六集鮑廷博年逾八旬好古績學老而不倦著加恩賞給舉人俾其世衍書香廣刊祕籍亦藝林之勝事也○諭晉昌身在伊犁將軍於邊疆務當鎮靜無綏此次俄羅斯與哈薩克台吉罕巴爾因交易事論係外夷常有之事天朝本不必過問且俄羅斯先在卡倫外四五十里居住一經卡倫官員諭令遷移又退出六七十里之外其情形極爲恭順乃晉昌聞信後遽派委協領哈芬布前往查辦哈芬布至彼輒於卡倫外安設帳房摘傳俄羅斯安集延頭目爲之剖斷議令罕巴爾償還財物辦理實屬舛誤晉昌才識拘隘不勝伊犁將軍之任部議降一級調用因伊本有革職留任之案請旨革任晉昌著革去領侍衛內大臣

斥退伊犁將軍念其人尙不至廢棄已另降清字諭旨令其署理
正白旗漢軍都統晉昌俟新任將軍松筠到彼再行交代來京供
職仍將革職留任處分帶於新任哈芬布著照部議降四級調用
○癸亥准駐防子弟應各省文武鄉試自丙子科始○增設熱河
圍場卡倫及兵額

東華續錄

嘉慶三十六

臣王先謙敬編

臣周渝恭校

秋七月丙寅諭向例發往吉林黑龍江爲奴人犯多係免死減等情罪較重者分給兵丁爲奴原使之備嘗艱苦長受折磨乃兵丁不能養贍竟有聽其贖身自謀生理者殊乖立法懲奸之意見已嚴行飭禁惟是該兵丁每月所領錢糧僅足自贖身家令其衆養遣犯多人適足以增苦累似不若改給該處官員爲奴伊等廉俸較優並約束亦易於爲力所有見在發黑龍江給披甲人爲奴之太監人數無多著卽全行改撥於黑龍江官員名下爲奴俾其役使管束無許再蹈贖身陋習如有故違者太監加重治罪該官員一併議處至該省發往人犯過多該處官員額缺有限亦恐不敷

養贖著交刑部將條例酌量變通再增入盛京及各處駐防以遺
犯情形之輕重分地方之遠近到配日均給與官員爲奴俾行之
日久免滋流弊該部妥議章程奏准後頒發遵行尋議發遣人犯
臣等於例內摘其情罪較重者五條仍發黑龍江吉林其情罪稍
重者十五條改發盛京情節稍輕者十五條改發各省駐防均給
各該處官員爲奴從之○丁卯以齊布森爲光祿寺卿福昂爲貴
州布政使額特布爲雲南按察使由儘道遷○己巳諭軍機大臣等百
齡等奏伏汛期內湖河水勢加長隄壩各工一律穩固一摺所辦
俱妥其議覆御史程贊甯條奏河工各款所議亦是朕思目今全
河之弊在於河底高仰治河之法惟有將兩岸隄堰修築鞏固並
防守料土貯備整齊一遇盛漲官弁兵夫實力保護使水無旁溢
之患則溜偏中泓河底愈刷愈深海口愈出愈暢一二年河病悉

除即可永底安瀾之績如程贊甯所請疏通下河水利及減水閘壩各款其說亦本之靳輔治河各書殊不知今昔情形不同斷難墨守舊說卽如醫生引用成方本皆古人經驗良劑而所施治之證寒熱虛實不能合宜非特不能奏效且至有損非古方之不善用之者不當耳治河之道亦復如是見在經費支絀該督等惟當師古人之意而酌以今之時勢凡河務應辦工程須擇其至當至要者方議舉修不可輕爲浮言所惑亦不可專爲成法所拘如治病者期於病除而止治河者期於全河順軌卽永慶平成之效也○甲戌申禁私販鴉片煙定官民服食者畢○丙子內閣學士色克精額緣事革職○丁丑諭御史馮大中奏京外各衙門辦事遲延怠緩請旨設法稽覈以符例限一摺所奏甚是爲政之道儆則有功京外各衙門積習相仍狃於疲玩經朕節次訓飭而公事積

歷之弊仍不能盡除近日部院堂官等奏事直日亦皆夙興待漏
循節無愆然詞以本衙門題奏事件或有不能條舉原委者是但
勞其身而不勞其心亦於政治奚裨夫大臣坐而論道殫心竭慮
全在於公署剖析例案釐剔弊端使所屬憚其嚴明不敢怠忽從
事則物無遁情案無留牘自然百務就理若但以奔走趨踰爲盡
職失之遠矣卽如議處議敘所以明示賞罰惟辦理迅速則身受
者立知感畏旁觀者共起勸懲乃任意遷延藉行查加級紀錄爲
名竟有經旬累月始行議上者殊不足以儆人心而動觀感嗣後
各衙門辦理議處議敘皆著依限趕辦無得藉口詳查級紀展緩
時日其應行議抵與否不妨於摺內先行聲敘請旨再行查明辦
理以免延閣各部院司官尤應手理案牘隨事稽覈使吏胥無所
售其奸其有蠹吏敢於惰慢者隨時賣革嚴儆勿稍寬假庶上下

相攝可期明作有功至於外省因循之習更不可問地方要務不
過刑名錢穀二端其於刑名案件不爲速結以致株連拖累案情
愈益譁張於錢穀事務亦不趕緊清釐報銷題覆動輒數年其閒
任催罔應轉輾牽混百弊叢生皆由該督撫不能精心敏力時加
振作遂至吏治日卽廢弛嗣後部中題奏事件著照該御史所奏
將科鈔咨文何日到部該衙門於何日具題俱於本尾聲明如有
遲延卽行附參至題本奉旨後行文以及咨行外省事件著各衙
門設立號簿登記如有遲延分別記過參處其外省遇有特交咨
交審辦各案件如實有不能依限完結者均著分別奏咨以備查
覈卽聲覆部院咨查事件亦著將何日接准部文何日咨覆一併
詳敘遲限者均予參處經此次訓飭之後內外大小官員其各振
刷精神力除痼習無卽怠荒以期熙績亮工共臻上理將此通諭

中外知之○庚辰以常格爲浙江布政使繼昌爲陝西按察使

由江

南江安糧道遷

○壬午

上啓鑾秋獮木蘭詔於禮成後謁

東陵○免

經過地方額賦十分之三○以張凱元爲陝西按察使

由湖北糧道遷

○

甲申以長齡爲烏嚕木齊都統調方受疇爲河南巡撫以李奕疇

爲浙江巡撫調蔣繼勳爲安徽布政使賞台斐音三品頂帶爲河

南布政使

由二等侍衛遷

○戊子

上駐蹕避暑山莊○己丑諭百齡奏

前任閩浙總督方維甸見丁母憂一摺方維甸歷任封疆均能勤

慎盡職因母老在籍侍養茲伊母吳氏病逝著加恩賜祭一壇派

江甯將軍興肇前往奠醊並著興肇傳旨慰諭方維甸令其節哀

守禮再圖爲國宜勞○方受疇乞假同籍以高杞署河南巡撫

由

郎侍郎署

八月乙未朔以瑪哈巴拉爲理藩院額外侍郎

喀喇沁公

○庚戌

上

自避暑山莊巡幸木蘭行圍○壬子諭吏部奏各省舉人自十三年戊辰科大挑後至明歲甲戌科已閱六載應否舉行挑選請旨等語各省舉人從前 皇考高宗純皇帝加恩寒畯特予大挑俾多士及時自效朕親政以來每閱六年按次舉行惟見在分發各直省者爲數過多該舉人等挑選以後補缺無期省垣需次資斧爲難此次若再照例挑選發往更形壅滯轉非所以體恤寒士之意所有明歲大挑著暫緩一科於丁丑科會試後舉行並著嗣後每屆四科奏請大挑一次仍照例扣除近三科舉人俟各省挑往人員漸次流通該部卽奏明再行照舊辦理○轉穆克登額爲刑部左侍郎調成格爲刑部右侍郎慶祥爲工部右侍郎轉普恭爲理藩院左侍郎以瑚圖禮爲理藩院右侍郎由駐藏大臣選○以高杞爲熱河都統台斐音署河南巡撫○戊午諭軍機大臣等李亨特覆

奏收蓄湖水情形並接閱給事中倪琇條陳一摺據稱微山湖自七月得雨後截至八月初三日共長水八寸見在湖心水止二尺有餘是以前此請於江境添設二閘以期擡蓄河水節省湖流倪琇摺內所言閘座太密漲水難消轉多淤阻似非真知灼見應否添建閘座仍請飭下江省督臣河臣悉心籌畫等語江省邳宿一帶向資微湖灌注浮送糧艘本年湖水不敷鋪注皆上年蓄水短絀所致並非因原設閘少瀉水過多李亨特不思疏濬泉源認真收蓄俾湖水日漸充裕總以江省應添建閘座爲詞屢行陳請越俎代謀顯係豫爲諉卸地步邳宿運河無庸添設閘座前據百齡黎世序等覆奏甚明卽舊有利運等閘已俱陸續修復完竣足資鈐束李亨特職任東河籌蓄湖水濟運是其事實本年東省春夏雨澤雖稀入秋以來澍雨優渥微湖上游各處泉源坡水儘敷挹

注卽使湖身稍有淤墊亦應設法疏濬俾得及時匯導蓄漸寬裕以便來年重運經臨隨時鋪放方爲稱職今不及早經理若屆時再有貽誤惟李亨特是問伊係棄瑕錄用之人試問能當此重咎否耶懷之慎之○辛酉調吳烜爲吏部右侍郎轉盧蔭溥爲兵部左侍郎以吳芳培爲兵部右侍郎

由內閣學士遷

九月甲子朔 上以陰雨減罔改出伊瑪圖出哨賞辦道兵丁半

月錢糧並免本日經過地方額賦十分之三○命 皇次子

皇三子祿愷先還京師○諭每月朔日向不進立決本章乃本日

理藩院由本報具題行劫致死事主之兇犯索密雅間擬斬梟一

本並未計算日期送交內閣內閣亦未計算日期輒轉遞行在均

屬錯誤內閣理藩院在京堂司各官著查取職名交部分別議處

○丁卯以直隸大名等三府旱命都察院左副都御史佛住鴻臚

寺卿彭希濂查辦賑務○戊辰 上駐蹕避暑山莊○癸酉 上

自避暑山莊回鑾○乙亥諭李亨特奏沁黃二河水勢異漲南岸

雖工下汛二堡無工處所大隄坐蟄過水見竭力搶辦自請治罪

並請將該管各道廳等分別懲處一摺李亨特本係棄瑕錄用之

人上年微山湖蓄水短少以致本年邳宿運河不敷鋪放糧運稽

緩皆由伊辦理不善本當卽行懲處姑從寬令其戴罪自贖茲又

有睢州下汛二堡漫口之事可見其平日漫不經心疏防貽誤怠

玩已極不能再爲寬貸著革職留於工次效力其河東河道總督

員缺著戴均元補授接奉此旨卽馳驛前往工次接印任事戴均

元曾任江南總河於南河工員內有素知諳練堵築者一面奏聞

一面調撥差委至該工督辦緊要見在廣厚陞見來京並著於途

次接奉此旨亦卽馳驛赴工會同戴均元督率妥辦迅就合龍俟

工竣後廣厚再來京陛見回湖南巡撫之任李亨特在工能否隨同出力並著廣厚等留心察看俟工竣時據實具奏再候諭旨其疏防失事之睢甯通判鮑居垣著革職專管工程之守備裴興鎮著革職並枷號工所俟工竣之日再行覈辦該管道員陳啓文亦著交部議處○諭軍機大臣等本日溫承惠奏河南滑縣老安地方有匪徒黃興宰黃興相兄弟並宋姓爲首興天理會於本月初七日聚眾滋事滑縣已失縣官被戕直隸長垣縣亦有習教之人並聞教匪竄往河南考城及山東曹縣一帶見在睢州二堡黃流漫溢台斐音馳往該處下游被水一帶查辦災務高杞此時若尙未起程離豫著卽挑帶將弁兵丁督同河北鎮總兵包克通阿星夜前赴該處加意防範並嚴飭沿河文武員弁嚴密防堵勿令偷渡河南致形滋蔓高杞俟方受疇到任後再來京赴熱河都統之

任○以溫承惠爲欽差大臣偕古北口提督馬瑜馳往長垣滑縣

剿賊○命陝西提督楊遇春來直隸協剿○命同興巡防山東邊

境剿捕賊黨○調初彭齡爲倉場侍郎盧蔭溥爲戶部左侍郎

兵部○以章煦署直隸總督○丙子諭軍機大臣等據索納賽接據

東明縣朱煒來報縣屬齊五集鐵匠張文典首稱有長垣縣南樂

集人姜復興託伊打鋼刀十把伊因情有可疑赴縣呈首該縣於

是日盤獲姜復興究出伊與滑縣白家道口宋義升長垣縣馬寨

村馬文隴夥同習教會託張文典打刀該縣當將該犯收禁又於

初十日接據長垣縣典史劉世治稟報有民人王白小向都司陳

夢熊處首告知縣被害該都司帶領兵勇搶出該縣屍骸看明徧

身有傷身首異處又據開州知州于曉稟報東明縣城已被圍勢

甚危迫等語該匪等聚眾戕官圍城猖獗可恨已極且俱用白布

纏頭身穿白衣看來竟係邪教並非飢民著溫承惠卽飛飭富蘭
連選弁兵帶領趕赴該處堵剿無令向各處竄逸該督俟兵力到
齊卽統率師干一鼓殄滅至擒獲醜類如有白布纏頭查係真實
賊犯卽槩行正法若無辜被脅之眾不可株連該督當仰體朕意
總以安民爲要其首逆黃興宰黃興相宋義升等犯就獲後卽派
委乾清門侍衛及文武妥員嚴密解京候朕親訊處以極刑以彰
國憲至長垣縣知縣趙綸如平日居官尙好猝被戕害卽奏明賞
給卹典如別有劣蹟無庸置議鐵匠張文典首先到官舉報尙知
畏法該督查明酌量獎賞○諭同興前次奏獲金鄉縣編造歌
詞斂錢惑眾之匪徒李允魁崔士俊張文明等十八人見據溫承
惠奏接據該督撫札稱教匪崔士俊等三十餘人供係長垣縣人
徐安爛傳授屬令密拏今長垣縣又有戕官之案東省與長垣接

壤該匪徒等同習邪教聲息相通於戕官搶劫之後既經逃往東省自係糾結黨與山東曹單鉅野一帶順刀會梟販匪徒甚多且與直隸河南見在滋事之處境宇毗連見派令溫承惠帶兵由北堵勦高杞帶兵在河南緊防西南其東路專責成同與防堵該撫選派精銳弁兵迅速親自帶赴東省邊界嚴密偵緝勿令匪徒乘閒闖入東境潛相勾結致滋蔓延再前該省拏獲之崔世俊等三十餘人見在監禁在獄著該撫卽嚴行訊鞫是否與黃興宰等係屬一黨一面錄供具奏卽一面將該犯等先行正法並多發告示剴切曉諭居民所有查拏懲辦者俱係鄰省滋事亂民斷不株連無辜以靖民心爲要○以高杞仍署河南巡撫○丁丑諭軍機大臣等本日據色克通阿奏稱滑縣匪徒牛亮臣等十餘人在該縣大伾山之東坡聚集匪徒數百打造軍器殺入縣署劫放獄囚見

帶兵前往勦辦等語昨已有旨令高杞接署河南巡撫印務帶兵
前赴滑縣查拏防堵見在色克通阿已帶兵五百名前來著高杞
卽迎合一處統率弁兵前往勦捕若兵力尙少著卽添調豫省官
兵併力殲除其防堵機宜滑縣南距黃河迤西卽係太行山徑該
撫務周密布置嚴防西南兩路勿使渡黃奔竄亦勿令竄入山谷
滋蔓難圖惟當堵剿兼施賊之於平原曠野之地則兵力易展四
面兜圍不難一鼓勦滅淨盡○予死事知縣趙綸祭葬世職○戊
寅 上駐蹕髻髻山行宮○諭軍機大臣等本日同興奏金鄉匪
犯崔士俊供稱該犯先從城武縣民劉燕傳習八卦離字教上年
八月間又從直隸長垣縣陳家莊人徐安輞改習震卦教徐安輞
曾告以今歲九月以後要交白洋劫屆時老教首送給白布小旗
一面插在門首可免殺戮又據獲犯張建木同供本年二月間徐

安囑亦曾到過伊家追崔士俊被拏該犯曾寫信知會徐安囑躲避等語徐安囑一犯前據溫承惠奏稱接據同興知會已派副將舒凌阿前往密拏見在長垣縣聚眾滋事是否卽係徐安囑爲首著溫承惠於勦捕時確實查明具奏正在降旨聞又據同興奏稱據曹州府並荷澤縣稟報定陶縣城於初十日黎明被陷文武官員存亡未保同興見已派兵分赴曹州東昌等處彈壓並親帶劉清率本標兵三百名前往督辦等語見降旨令同興督兵往勦將賊匪由東北偏向西南其河南邊界又降旨令白斐音將所帶兵一千二百名全數交與高杞帶領防堵溫承惠當飭催直隸派出鎮將兵丁迅速前往合力勦捕務期一戰成功又諭本日申刻又遞到同興本月十三日由五百里馳奏之摺內稱接據曹州府百歲稟報賊匪於十一日續陷曹縣在彼占據見在兗州鎮總兵陳

廣甯已由濟甯帶兵馳往同興亦由東昌集兵前進勦辦等語賊
匪於數日之間將定陶曹縣兩處攻陷旋向東南肆逆看來並非
東省另起之賊自卽係長垣滑縣等處賊匪相率竄往刻已降旨
派徐州鎮總兵沈洪帶兵一千名由江省自南而北堵勦前進賊
匪此時既向東竄則長垣東明開州一帶賊蹤想已漸遠溫承惡
卽當迅統大兵由長垣滑縣一帶進發如該二縣已無賊屯聚卽
探明大股賊匪所在直赴曹州定陶一帶與東省堵勦之兵併力

夾擊○轉吳芳培爲兵部左侍郎以溫汝道爲兵部右侍郎

由左副都

御史

○己卯諭縣名縣愷奏本月十五日午刻突有賊人擅入蒼

霞門經總管太監擒獲未刻內右門西又有賊匪越牆入內縣

名

見事在倉卒取進烏槍撒袋腰刀先用槍將牆上一賊打墜又有
手執白旗之賊在牆上指揮復用槍擊斃實出無奈大膽等語縣

名係內廷皇子在上書房讀書一聞有警自用槍擊斃二賊餘賊

始紛紛潛匿不敢上牆實屬有膽有識乃縣名奏稱大膽無奈詞

語謹飭殊覺過當朕垂淚覽之可嘉之至筆不能宣宮庭內地奉

有祖考神御皇后見亦在官名身先捍禦獲保安全實

屬忠孝兼備二阿哥著加恩封爲智親王於皇子歲支分例

加倍歲給俸銀一萬二千兩以示優獎三阿哥名懋隨同捕賊亦

屬可嘉朕於在廷臣工有功必賞今皇子能如此忠勇自效豈容

稍靳恩施此大公之心內外諸臣當共知感知奮也○諭軍機大

臣等本日申刻儀親王等遞到勦辦賊匪事已大定一摺據訊取

活賊供詞賊匪共進禁城二百名見所呈遞草單三紙內細數賊

斃及活拏者共止三十一名其餘賊匪一百六十九名究竟作何

下落所奏殊不明晰再成親王訊出賊供地安門外尙有賊五百

名此項賊匪此時是否伏而未動抑係查有蹤迹伊等見在如何
辦法摺內亦未提及著儀親王等卽速明白回奏至摺內請將格
布舍等六人留京勦捕賊匪事屬可行內蘇爾慎格布舍二人著
速迎赴行在朕面詢剿賊情形其伊勒通阿等四人留京實令當
同搜捕俟朕回鑾後再諭令一同馳赴軍營又諭此次賊匪突入
禁門並敢潛匿膳房王公大臣侍衛官兵人等奮勇擒捕實爲可
嘉內有在內右門以內擒獲賊匪者功績最優在禁城內捕賊者
次之著托津等詳細查明開單具奏此內捕賊受傷身死者列爲
上等其受傷重者列爲二等受傷輕者列爲三等無論侍衛官兵
卽家人閒散等俱一律歸入等第開單呈覽候朕分別施恩托津
等務須秉公確查不可稍徇情面俟朕進宮後再行呈遞亦不爲
遲見在二阿哥躬親捕賊忠孝可嘉已施恩錫封智親王著托津

等啓知二阿哥不必遠來謝恩俟朕進宮時在內東華門之內道旁拉頭謝恩三阿哥四阿哥等仍照常在内接駕○詔停謁陵由白澗還京師○以憚弛門禁奪步軍統領吉綸左翼總兵銜王麟職○命托津英和先回京師查辦諸逆匪○命陝甘總督那彥成酌帶勇幹將備馳驛來京○命江南提督烏爾卿額駐徐州安徽壽春鎮總兵官喀勒吉善赴潁亳一帶防守○以成甯爲工部尙書轉文甯爲吏部左侍郎調秀甯爲吏部右侍郎瑚圖禮爲禮部左侍郎以禧恩爲理藩院右侍郎由內閣學士遷○以佛住爲禮部右侍郎由左副都御史遷蘇楞額爲戶部左侍郎由內務府總管大臣遷○庚辰上以遇變下罪己詔曰朕以涼德仰承皇考付託兢兢業業十有八年不敢暇豫卽位之初白蓮教煽亂四省黎民遭劫慘不忍言命將出師八年始定方期與吾赤子永樂昇平忽於九月初六日

河南滑縣又起天理教匪由直隸長垣至山東曹縣亟命總督溫承惠率兵剿辦然此事究在千里之外猝於九月十五日變生肘腋禍起蕭牆天理教逆匪七十餘眾犯禁門入大內戕害兵役進宮四賊立即捆縛有執旗上牆三賊欲入養心門朕之皇次子親執烏槍連斃二賊貝勒蘇志續擊一賊始行退下大內平定實皇次子之力也隆宗門外諸王大臣督率烏槍兵靖二日一夜之力剿捕按拏淨盡矣我大清國一百七十年以來定鼎燕京 列祖列宗深仁厚澤愛民如子 聖德 仁心奚能縷述朕雖未能仰紹愛民之實政亦無害民之虐事突遭此變實不可解總緣德涼愆積惟自責耳然變起一時禍積有日當今大弊在因循怠玩四字實中外之所同朕雖再三告誡舌敝唇焦奈諸臣未能領會悠忽爲政以致釀成漢唐宋明未有之事較之明季挺擊一案何

音倍徒思及此實不忍再言矣予惟返躬修省改過正心上答

天慈下釋民怨諸臣若願爲大清國之忠良則當赤心爲國竭力
盡心匡朕之咎移民之俗若自甘卑鄙則當挂冠致仕了此一身
切勿尸祿保位益增朕罪筆隨淚灑通諭知之○諭此次賊匪擅
入紫禁城經王大臣侍衛官員等奮力搜捕擒殲淨盡儀親王成
親王在紫禁城內親身督辦晝夜勤勞甚屬可嘉著加恩將所有
未經開復處分及未完罰俸悉予開復寬免又本日和世泰奏稱
昨據二阿哥告知前日賊匪突入禁城縣志先入大內經二阿哥
將自帶烏槍交給點放縣志於二阿哥槍斃兩賊之後亦用槍斃
賊一名其餘賊匪始皆畏懼避匿縣志爲儀親王之子係朕親姪
如此奮勇出力著加恩賞加郡王銜於歲支貝勒俸銀二千五百
兩外每年加給銀一千兩以示嘉獎莊親王縣課於賊匪奔突之

時親身持械勦捕並射傷賊匪一名亦屬奮勇著加恩將從前所
罰王俸未完者全行寬免仍交宗人府從優議敘奕顯安成蘇爾
慎格布舍四人各殺斃賊匪均屬出力奕顯安成著交宗人府兵
部從優議敘蘇爾慎著賞給副都統銜仍交部議敘格布舍著交
部議敘三等侍衛阿勒罕保親軍校清福亦皆殲斃賊匪阿勒罕
保著升爲二等侍衛清福著升爲三等侍衛其餘出力各員俟托
津等查明再行施恩至派出捕賊兵丁經王大臣等帶入紫禁城
內者健銳火器兩營兵丁尤爲勇銳著查明各賞給一月錢糧前
鋒護軍營及八旗步軍營兵丁查明各賞給半月錢糧又諭本月
十五日賊匪擅入禁城係由宣武門入東華門西華門進蒼霞門
該管步軍統領等門禁懈弛已將吉綸玉麟革職是日紫禁城直
班係署護軍統領楊澍曾其咎更重楊澍曾著革職卽日發往伊

犁效力贖罪至此三門蒼震門係在大內疏防最重東華門西華門次之宣武門又次之所有該班之官員兵丁等除受傷身故及受傷者將功抵過無庸議外其餘著托津等查明會同刑部分等治罪據訊取見獲賊犯供詞多係直隸固安縣及黃村一帶籍貫鄒炳泰李鈞簡在順天府尹任內平日漫無查察以致獲癰胎患鄒炳泰著以中允贊善降補李鈞簡著降爲編修溫承惠身任直隸總督順天府屬地方皆其所轄著交部嚴加議處劉鑽之費錫章到任未久著交部議處○諭軍機大臣等前同興所奏首犯劉真空潛匿離京二十八里之沙河順天北路廳同知卽駐紮沙河地方該處距圓明園不遠著英和派明幹可靠員弁前往密行緝緝有無蹤迹見在刑部監獄朝審人犯不少又加以逆匪多名著托津等傳諭刑部堂官留心防範英和並添派弁兵小心巡察再

見在格斃各屍除兵役屍首令家屬認領查明再行施恩外其已斃賊屍令活賊指明拖赴外城分地剉屍梟示不必盡在市口其見訊逆犯錄供後如無可再訊者先凌遲一二名以後陸續辦理止留爲首要犯四名豫備延訊所留逆犯此時轉不必用刑俟延訊時盡法處治見已明降諭旨將門禁懈弛之官兵分別懲辦著托津等於訊供時嚴鞫賊犯未必悉由宣武門入城如有自他門入者亦查明將該管官兵一體治罪再見在紫禁城內旣已搜查淨盡無須多兵駐守著托津等酌留若干在禁城內分設堆撥撤出若干在皇城內分設堆撥禁城內酌留之數比之皇城內尙可略少派定後先行具奏至昨降諭旨飭令在京都統護軍統領等各查所轄地面此事非一二日所能辦竣恐草率從事轉屬有名無實著傳知該都統等從容詳辦其挨查之法所有王公以下二

品文武大員以上無庸點查著傳令該本家等自行查明實無形迹可疑之人令其出具切結報明該管大臣如有隱匿情事發覺後從重治罪其三品以下官員以及軍民鋪戶人等俱著逐戶挨查除婦女不查外丁男按名點驗勿稍疏漏如有外來行蹤詭秘之人隱匿在家卽行拏究○命那彥成爲欽差大臣督兵剿河南賊匪溫承惠等專辦糧餉○調曹振鏞爲吏部尙書協辦大學士潘世恩爲戶部尙書以章煦爲工部尙書陳預爲刑部右侍郎翁元圻爲湖南布政使伊湯安爲貴州按察使由貴西道遷○辛巳諭本年九月初六日豫東交界地方有亂民戕官滋事拏獲匪犯供係天理會邪教並據同興奏稱會內首逆林姓又捏名劉林在近京藏匿正在降旨飭拏間十五日忽有賊匪潛入紫禁城持械逞兇經王大臣及文武官兵協力圍捕殲擒淨盡嚴究首犯據英和等

選派番役於近京之宋家莊地方拏獲林清一犯供稱前生姓劉
所有十五日潛入紫禁城賊匪均由伊派撥屬實該犯傳習邪教
糾眾謀逆罪大惡極今夥黨殲除首逆旋即就獲仰承 天 祖

恩佑欽感實深除將該逆按律懲辦外英和督拏要犯剋日就擒
厥功甚鉅英和著交部從優議敘其原拏之官員番役人等著交
英和分別等第開單呈覽候朕明日進宮再降恩旨○諭軍機大
臣等據托津等奏訊據賊犯陳爽供出太監劉得財等夥同入教
等語覽奏實堪駭異該犯等供役內廷膽敢習教入夥並聽從逆
犯指揮豫爲引路實屬罪大惡極著托津等將已獲各太監等隔
別嚴訊務令將同夥之犯逐一全行供出勿令稍有狡飾隱匿至
該犯等以內監謀逆悉當問以大逆凌遲該犯等家屬亦應緣坐
著英和等卽刻按名查拏此案入教各太監內劉得財一名係太

監內入教傳徒首犯情節尤爲可惡著留備廷訊並再留情罪較重者一名候朕親加嚴鞠盡法處治所有托津等訊出從逆太監見據二阿哥奏交五名外又續交九名托津等陸續訊出如尙有在逃者著步軍統領順天府五城及內務府番役一體嚴拏務獲見在無論已獲未獲先查明係在何處當差之人開具清單於明日具奏至林清一犯係屬首逆托津等審訊時務令將夥犯人數悉行供出以便按名根究林清並備廷訊無稍疏虞○撥京倉米五萬石備大名軍精○壬午 上還京師○諭軍機大臣等前日拏獲突入禁城滋事各逆犯究出首逆劉真空卽林清已在黃村拏獲訊據該逆供係八卦教今改名天理教其黨與散布各處磁州頭目係趙得一長垣頭目係賈士元羅文志鉅鹿頭目係楊遇山又饒陽南宮等縣喜峰口並滑縣之大頭目劉玉瀝馮克善各

有五百多人等語長垣滑縣賊首自己隨同起事其磁州饒陽鉅鹿南宮喜峰口賊匪仍伏而未動著章煦卽選派妥幹員弁前往密訪嚴拏務將賊首緝獲訊明由驛速奏如有抗違拒捕情事卽飛咨溫承惠派官勦捕就地殲除毋任竄逸句結又諭首逆林清見經拏獲訊據供認八卦教今改名天理教人數眾多散布各處山東東昌府一路係李萬成爲首曹縣一路係徐安輞爲首德州一路係宋躍瀧爲首金鄉一路係崔士俊爲首手下各有數百人等語崔士俊業已正法徐安輞已在長垣滋事其東昌之李萬成德州之宋躍瀧尙伏而未動著同興卽選派妥幹員弁分往東昌德州不動聲色密訪嚴拏獲犯後訊供由驛速奏備有抗違拒捕情事卽速調兵就地勦捕毋任竄逸句結又諭前日據同興密奏拏獲金鄉教匪張建木訊據供稱傳教大頭目劉輞明告知這教

山西最多先收集山西多年如今續收山東其收西邊的人係于克敬係山西人見在河南滑縣等語又見在拏獲突入禁城滋事匪犯之總教首林清供稱八卦教今改爲天理教有艮卦頭目王道澹在歸化城傳教等語河南滑縣及山東定陶曹縣等處教匪滋事連陷數縣于克敬一犯雖在河南滑縣此時或潛回山西其王道澹一犯見在歸化城著衡齡卽速選派妥幹員弁不動聲色密訪嚴拏務獲拏獲後訊取供詞由驛速奏先須密爲布置不可使聞風蠢動如有糾約拒捕情事著卽派兵立時撲滅毋任竄逸句結又諭本月十五日突入禁城各匪犯見已殲捕淨盡其總頭目林清業已拏獲訊據該逆供係八卦教今改名天理教散布各處有乾卦頭目華姓見在宣化府兌卦頭目王忠順見在潼關坤卦頭目魏正中見在安慶著貢楚克扎布朱勳胡克家卽速選派

受幹員弁密訪嚴拏務獲拏獲後訊取供詞由驛速奏務須不動
聲色將首逆擒獲勿令聞風蠢動如有抗違拒捕情事並著派兵
立時撲滅毋任竄逸句結○癸未諭我朝定鼎以來 列祖 列
宗愛民如子深仁厚澤洽於寰區朕繼承大統保惠黎元惟恐一
夫不得其所凡食毛踐土之倫縱不能家喻戶曉豈身享太平亦
竟忘其所自乃本月十五日忽有教匪七十餘眾突入禁門將至
大內幸皇次子親執鳥槍連斃二賊逆黨始退王大臣督率官兵
殲戮淨盡仰賴 天 祖庇佑渠魁就獲餘孽悉平越三日朕由
行在還宮京城內外安堵如常事定思痛此實非常未有之變寇
賊叛逆何代無之今事起倉卒擾及宮禁傳之道路駭人聽聞非
朕之涼德何以致此但諸王大臣同國休戚今使皇子親執火器
禦賊於禁籞之中諸臣其何以爲顏返而思之更何以爲心乎本

日特於乾清宮召見諸皇子及諸王文武大臣面加訓諭令王大臣等各殫忠竭慮以匡國治勿再因循怠玩平日文恬武嬉事至則措置失宜事過則泄者如故素餐尸位益重朕辜夫涓涓不塞將爲江河禍變之來必有由致不究其本患將未已諸王大臣及各言官如能洞見致患之原官常吏治有亟須整飭修明者各據所知剴切直陳朕必衷而行之若瑣瑣焉摘一事改一例博建言之名以圖塞責朕甚無取焉將此通諭知之○諭本月十五日有賊匪突入紫禁城滋事次日朕於行在接據留京王大臣奏報不能深悉情形恐賊黨眾多潛匿市閭當降旨飭令在京都統前鋒統領護軍統領副都統等各於所轄地面逐戶挨查昨日朕進宮時見京城內外一切安堵如常其日前滋事賊匪早經殲捕淨盡逆匪之總頭目林清拏獲審訊據供伊所遣入城謀逆匪徒本止

數十人除見已殲擒各犯餘匪數人聞挈遁歸俱經伊目見都城
實無遺孽所有各旗都統等挨查地面之處著卽停止自本日奉
旨之後如有藉口稽查擾累居民者該管大臣查參嚴懲○諭國
家熙績亮工豈能以一人獨理天下惟賴大臣等盡心翊贊無曠
厥官方克收股肱心膂之效朕眷念耆舊臣工中宣力有年者多
不忍卽予屏退而陳力就列不能者止在臣子則當自權進退之
義古人七十致仕雖平素才猷卓越者精力就衰卽不肯貽誚素
餐況才具素本中平年齒旣邁仍居高位其職守所在悉屬曠瘠
而賢路轉因而阻塞見當整飭紀綱之時當先行於貴近大學士
慶桂劉權之俱年老多病於所管事務不能盡職著均以原品休
致慶桂從乾隆年間卽任軍機大臣朕親政後仍贊襄機務前平
三省邪匪與有勤勞加恩賞給全俸以養餘年劉權之曾經獲咎

其年齒雖老在閣臣中資格較淺加恩給予半俸禮部尙書王懿修亦年力衰積並著以原品休致○建陝西甯陝廳 文廟○甲

申首逆李文成等據滑縣並屯縣屬之道口鎮命溫承惠赴河南與高杞合兵勦之同興專勦山東賊匪○命松筠爲東閣大學士

仍留伊犁將軍曹振鏞爲體仁閣大學士托津百齡爲協辦大學

士○調鐵保爲吏部尙書以德文爲禮部尙書明亮爲左都御史

由都統遷○以胡長齡爲禮部尙書轉汪廷珍爲禮部左侍郎以王宗

誠爲禮部右侍郎由內閣學士遷○調章煦爲吏部尙書以周兆基爲工

部尙書轉吳烜爲吏部左侍郎以吳璥爲吏部右侍郎由內閣學士遷○

以周系英鮑桂星俱爲內閣學士周系英由大理寺卿鮑桂星由詹事遷○予獲匪

被劫遇害河南滑縣知縣強克捷祭葬世職○乙酉諭台斐音奏

報官兵連次痛勦賊匪濬縣圍解見在進攻滑城剋期收復各緣

由一摺據稱本月十六日色克通阿率領將備行抵濬縣石羊村有賊匪百餘人迎敵官兵槍礮齊發登時打死數十人生擒二人餘匪逃逸次日卯刻色克通阿督兵行三里許遇賊千餘人與官兵拒敵經參將張拱辰陳弼直前搏戰賊眾驚潰官兵追殺三十餘里殲賊六七百人午後趕赴濬縣城外該匪約有二千餘人占據山梁縣城被圍運河石橋阻隔復經參將張拱辰陳弼奮勇先登搶過石橋賊人抵死抗拒官兵槍箭齊發打斃賊匪一千七八百人擒獲活賊一百餘人濬縣城圍立解尋獲馬廐槍刀旗幟甚多等語所辦俱好豫境賊匪嘯聚搶劫茲官兵甫經接仗即將該匪殲斃二千五百餘人生擒一百餘名可見該匪等不過烏合之眾經此番殄戮業已喪膽指日大兵會集四面兜圍無難一鼓殲除總兵色克通阿參將張拱辰陳弼奮勉可嘉色克通阿著交部

議敘張拱辰陳弼交部從優議敘張拱辰陳弼著高杞查明該二人如向未得有翎支俱著賞戴花翎以示獎勵至摺內所稱此次打仗守城文武各官先已獎賞仍擇其尤爲出力者另摺保奏官員效力行間奮勉出力自當加之鼓勵但必須覈實辦理勿蹈從前軍營陋習稍涉瞻徇致令有功者屈抑無功者冒濫方足以服人心而勵士氣所有出力各員著高杞確實查明開單保奏候朕施恩○丙戌 上廷訊首逆林清逆黨劉進亨太監劉得財劉金悉凌遲處死並傳示林清首於直隸河南山東賊匪滋擾地方○諭國家撫御寰區百數十年來溥海蒸黎畏神服教凡有血氣莫不尊親乃本月十五日近郊忽有逆賊數十人突入禁門謀逆此實意外之變經王大臣等派兵殲捕馳奏行在朕於途次聞有逆賊數人潛逸京外之黃村及董村等處此等叻惡逆犯覆載不容

若不盡數誅夷不足以彰國典因派拉旺多爾濟等帶兵掩捕官兵未至董村卽望見該處火起延燒拉旺多爾濟等到彼撲熄詢悉在逃逆賊縱火焚燒乘閒四逸而良民猝見兵火亦不免驚怖奔逃有展轉溝壑者此外兵役接捕想各居民亦無不驚擾因逆賊而累及良民朕思之轉爲之不忍見在就獲各逆犯俱經嚴訊伏法首逆劉林卽林清本日廷訊盡法懲治寸磔傳首其妻子親屬均一一按名捕獲照律絲坐鉅案已結毫無株連念附近良民因此等奸宄滋事聞致失所朕斷不肯因近郊有數十莠民稍減愛憐赤子之心著施恩將大興宛平二縣本年應徵錢糧全行豁免以示憫恤見在近畿各處仍恐有一二餘犯在逃尙須嚴密偵緝已嚴諭官吏等確訪指名擒捕不許波及無辜百姓等毋得聞風驚懼自行紛擾惟當感激深恩安靜守法勉爲善良共享太平

之福其或冥頑不靈受人愚惑甚至有隱匿奸黨一經官吏訪獲必從重治罪不貸將此刊刻謄黃通諭知之○諭本月十五日逆首林清潛遣逆夥數十人突入禁城滋事一案嚴訊見獲賊犯據供太監內竟有逆賊六人與謀引路其引賊入東華門者係劉得財劉金二犯引賊入西華門者係張太高廣幅二犯又王福祿閻進喜二犯在內接應續據南城御史緝獲賊夥林四又究出楊進忠一犯亦由西華門引賊入內該逆賊等罪惡滔天爲從來所未有除高廣幅一犯於是日經官兵殲斃外其劉得財等六犯俱按名捕獲無一漏網連日軍機大臣會同刑部研究本日朕親自廷訊盡法處治逆賊劉得財等堅供此外再無通同謀逆之人復嚴詰首逆林清亦堅供在內同謀止此七人更無餘黨所有本日執事站班文武大小各員人人聽聞供情毫無疑義卽將各該犯凌

遲處死太監等充當差使等級懸殊凡近御者皆馴謹誠樸之人此案逆賊七人平日所當差使俱極疏賤從未見過不知姓名僅於宮內看守門戶從無一名會隨赴御園者宮中所留首領曉事者少平日約束懈弛聽伊等告假閒遊致令交結外人甚至如廣甯門馬駒橋等處數十里之外任其恣意往還聽從賊匪糾約謀逆以致釀成巨案本日朕嚴詰該逆賊謀叛之由皆俛首無可供吐復訊以朕平日有無苛待伊等之處該逆賊供稱素來天恩寬厚近日復又加賞錢糧更有何銜怨之處尙口稱佛爺不置是該逆賊等全係被外間匪徒迷惑至死不悟而任其出入自便該首領等疏懈之罪實無可辭嗣後嚴諭總管首領太監等俱不得任各處太監藉詞告假獨自私出禁門其有不得不暫時給假者並著該首領太監查問確實限以時刻必須兩三人同行方准放出

如違除本人治罪外將該管首領太監一併治罪至此數犯梟獍
性成本非常有見在訊問明確別無同黨之人此外各太監等當
咸戴主恩照常當差安靜守法不必心生疑畏儻有狡譎之徒挾
嫌誣扳查明從重治罪斷不寬及無辜將此旨交總管內務府大
臣轉交總管太監通諭各等處太監知之並著載入宮史○丁亥
以逆匪犯關時雷雨交作殛斃賊黨命 皇次子智親王 皇三
子縣愷詣 昭顯廟 時應宮拈香○諭諸王大臣等逆匪突入
禁城實非常之大變今雖首逆伏誅餘黨就戮閭閻安輯城市如
常此正我君臣臥薪嘗膽之日永懷安不忘危之念勵精圖治夙
夜在公庶幾補救前非仰承 天眷因思十月初六日爲朕壽辰
國家典禮自初三日至初九日俱穿蟒袍補褂正日御正大光明
殿受賀此定例也今歲突遇此禍若仍照常年典禮而行朕實無

顏受賀况軍書交馳邪氛未靖尙有何心宴樂乎非博虛名實無
暇也向年俱進如意卽日回賞原上下聯情之意耳今遇大不如
意之事豈可復行呈進朕不見此物轉覺心安見物思名益增煩
悶今酌省繁文副予做惕之念諸王大臣愛戴之忱仍可得伸著
於初五初六初七三日穿蟒袍補褂初六日朕御乾清宮皇子諸
王貝勒貝子公文武頭品大臣二品內廷行走諸臣御前侍衛乾
清門侍衛俱在乾清門內行禮二品文武大臣三四五品京堂俱
在保和殿階下向乾清門行禮除此俱在本衙門行禮作樂排儀
仗照常不必宣表行禮後朕酌簡數人進甯壽宮入座賜宴勉盡
一日之歡而已至歲朝禮節一切如常彼時亦不矯情刪改此次
壽辰實無心緒爾諸臣勿行奏額副朕苦衷爲是特諭○以果齊
斯歡爲兵部右侍郎

由內閣
學士選

○戊子禮親王昭槤等奏請於萬

壽聖節前後初三初四初八初九四日俱穿補服初十日 皇后

千秋令節擬穿蟒袍一日得旨勉從所請實深愧憤初十日不必

穿蟒袍稍示區別願諸王大臣清夜捫心究竟欲作何等人成何

等事業三思而行勿甘暴棄朕亦無顏瀆告矣○以寶興黃鉞俱

爲內閣學士

寶興由少詹事黃鉞由翰林院侍讀學士遷

○己丑諭高杞奏潯縣賊匪

經前次官軍殲擒數千名後餘匪竄回道口滑縣等處連日仍敢

前來窺伺該署撫督同色克通阿張拱辰陳弼帶領備弁兵丁槍

礮齊發賊匪抵死抗拒官兵奮勇直前殲斃賊匪三百餘人生擒

六十一名奪獲馬器械甚多搜出冊檔四本首葉開載有後天

祖師林清字據提犯嚴審內蔡成功一犯眾賊呼爲蔡四大王其

偽職卽係林清所封潯滑一帶聽伊勾結調遣並有被獲之徐夢

林一犯亦受林逆偽封宰相該署撫於審明後卽將該犯蔡成功

等營割示眾等語高杞於馳抵豫省後督率將弁奮勇殺賊生擒
受賊僞職之著名賊目蔡成功徐夢林等審明正法並接獲賊黨
冊籍甚屬可嘉高杞著交部議敘濬縣知縣朱鳳森經賊匪屢次
攻城該縣守禦完固並將城內奸細查拏正法以絕內應朱鳳森
著加恩賞加同知銜先換頂帶以示鼓勵○辛卯諭軍機大臣等
豫省賊匪見在衛輝滑縣一帶屯聚衛輝迤西係懷慶洛陽接連
陝州其迤北由彰德近接太行界連山西澤潞恐賊匪狡計百出
乘閒四竄那彥成接奉連次諭旨自己由蘭州起程著迅速行走
帶領西安馬隊官兵探明賊蹤迎頭截剿前來毋稍稽遲○裁翰
林院筆帖式四員添設於步軍統領衙門○免直隸被賊滋擾之
長垣等三州縣新舊額賦○撥長蘆運庫銀二十萬兩備直隸軍
需○癸巳諭日前奸民突入禁門仰賴 天 地 宗 社靈佑

渠魁就戮餘孽肅清朕欽感 鴻慈涓吉於十月初一日虔申告
祭前降諭旨甚明並令翰林院特撰祝文敬達祀謝之忱乃太常
寺拘泥是日爲每歲時饗之期於 太廟後殿用新撰祝文 太
廟前殿朕躬親告祭轉沿用時饗祝文實屬昏愆錯謬該衙門二
十八日具奏之摺前止聲敘告祭所用祭品其餘恭讀祝文並未
明白請旨非尋常錯誤可比太常寺堂官俱著交部嚴加議處速
具摺奏不許稍遲時日德文著先摘去頂帶聽候部議尋議禮部
尙書兼管太常寺事務德文太常寺卿書與朱紹曾少卿舒甯鮑
勳茂均應革職從之○調成甯爲禮部尙書以英和爲工部尙書

由步軍
統領遷

冬十月甲午朔諭見在未獲各逆李文成劉幅明徐安輜于克敬
王學禮馮克善六犯俱係震卦教大頭目又前次突入禁門逆犯

內祝現劉第五係林清手下大徒弟見在查拏尙無下落必應嚴
拏盡法處治此內李文成徐安輻自係在滑縣長垣起事匪徒股
內或潛赴直隸勾結亦未可定其祝現劉第五二犯於滋事後或
逃往直隸一帶投歸夥黨著章煦飭知地方文武員弁嚴密查拏
勿任漏網○丙申祖之望以疾免以韓封爲刑部尙書調董教增
爲廣東巡撫以朱勳爲陝西巡撫慶蛟爲陝西布政使山湖南按察使遷
○丁酉以恒敏爲湖南按察使山糧道遷○辛丑命溫承惠高杞同興
俱受那彥成節制○癸卯山東鹽運使劉清勦賊於扈家集大破
之賞布政使銜○乙巳以攻克山東定陶曹縣賊巢功副都統銜
蘇爾慎等下部議敘○丙午諭逆賊林清滋事一案溫承惠係直
隸總督順天府所屬地方皆其所轄且在任年久乃於該逆傳習
邪教煽惑多人八年之久並不及早查拏以致奸匪糾眾謀逆昨

九月十五日竟敢潛布黨與直犯禁門並欲於蹕途伺劫雖其謀因兵衛森嚴而止而禁門內則已有匪徒闖入幸荷 天恩垂佑首惡伏法餘黨悉誅而河南山東滑濬曹定滋事亂民悉由該逆布散邪言同期造反至今餘孽未淨從前山東逆匪王倫滋事之案亦因倡興白蓮邪教而起巡撫徐績因此獲咎然王倫於乾隆三十九年秋間滋事而其倡興邪教即在是年春間爲日尙淺林清則於嘉慶十一年業已傳教至今有八年之久溫承惠不能訪聞破案其咎本重適前月先聞河南滑縣及直隸長垣賊匪滋事之信朕因溫承惠同興俱係本省督撫因各派其帶兵勦賊俾令自贖旬日以來同興訪出大逆林清馳奏方能擒賊靖亂此功甚偉進兵奮勉連次奏捷是以恕其失察之咎並加恩給予議敘溫承惠帶兵由保定前赴大名行走已覺濡滯本月初三日在滑縣

劉固村等處勦賊一次初九日又在滑縣道口一帶得有勝仗然
兩次勦賊千有餘名賊勢尙未窮賊且直隸本境內如開州長垣
東明等處亦尙未接勦淨盡其籌畫不周之咎更無可辭溫承惠
著革去總督拔去花翎賞給五品職銜責令辦理那彥成一路軍
營糧餉以示薄懲如不知愧知感再有貽誤著那彥成嚴參拏問
治罪如辦理奮勉將來軍務告藏著那彥成奏明再行酌量錄用
其直隸總督員缺著那彥成補授那彥成未到任以前仍著章煦
署理○諭張鵬展奏確陳百姓平日不敢首告邪匪緣由並見在
裏脅情形請區分良莠聯民攻賊一摺所論皆是百姓良善者多
平居鄉里之間見有邪匪莠民斷無甘與爲伍不慮干連之理惟
因一經首告地方官先畏懼處分相率諱匿甚或將首告之人坐
誣而匪徒轉逍遙無事於是奸民益與首告之良民積恨成仇必

乘閒肆其荼毒良民卽知畏法甯不思自保身家共相隱忍迫爲日旣久奸民黨與漸多肆行無忌寢成叛逆是地方官止因規避吏議起見而養癰貽患其害遂至於不可言不知邪慝之積非由一日地方官果能發奸摘伏翦其萌蘖不但前此失察可邀寬免設因此消弭大患並可加以恩獎其始終掩飾旣經告發仍姑息養奸置之不理者則是縱容奸宄罪在不宥昨因御史恒麟奏及已有旨令吏兵二部將文武各員失察處分另行酌議寬其既往失察之咎嚴其將來諱匿之罰地方官各宜懍遵毋再玩愒至見在滋事亂民其甘心悖逆者本屬無多其餘烏合之眾大半由於脅從官兵等臨陣勦殺以及按捕村莊自應區別莠良嚴禁濫殺已連降諭旨飭知領兵大員等務各申明軍紀仰副朕除賊安民之意○諭軍機大臣等見在開州長垣東明一帶賊勢蔓延直豫

大兵俱聚於涪滑界內賊股數處轉在我兵之後大名以北又無重兵駐守不特軍營後路空虛如賊匪被剿北竄尤不可不豫爲防範馬瑜見任直隸提督富蘭曾任正定總兵該省情形較爲熟悉著馬瑜富蘭二人卽帶同巴圖魯侍衛數人率領直隸官兵二千名由涪縣繞道速赴開州以北將開州東明長垣三處邊界之賊逐一搜捕總當由北向南步步進剿不必長驅直入務期殲捕淨盡勿留餘孽昨令慶祥等帶領健銳火器兩營官兵各五百名分作四起前赴豫省軍營著馬瑜富蘭於慶祥等所押各起官兵路過大名時卽傳旨令其先在該提督軍營剿捕直隸邊境賊匪俟直境肅清後再赴豫省軍營總以顧住北面勿使賊匪散竄爲要此路剿賊機宜專責成馬瑜富蘭二人其奏報之摺卽著馬瑜富蘭聯名具奏毋庸再與欽差大臣會銜俾得迅速遞報以慰廑

注○調慶格爲山西按察使錢臻爲直隸按察使○己酉諭軍機大臣等那彥成奏探明賊匪見在情形通籌全局一摺覽奏實深憤懣豫省匪徒前溫承惠於濬縣道口得有勝仗因其未能大加勦戮辦理遲延降旨褫革乃那彥成於初八日已抵衛輝初十日接收欽差大臣關防十三日發摺時仍在衛輝駐紮並未至濬縣軍營茲奏報見有之兵不敷分勦請調大同鎮及甘肅甯靖綏遠等處之兵並欲俟吉林索倫兵到齊方敷勦辦其言實屬畏葸遷延之至吉林黑龍江兵到齊約計總在十二月間甘肅距豫遙遠非剋期可至屆期天氣沍寒無論進勦不能得力且此兩月中任賊匪盤踞蹂躪養精蓄銳該督等束手坐視縱賊殃民自作孽矣況目下最好機會乃賊匪安踞滑縣正如魚游釜中若官兵日久不戰賊匪停留長智聞官兵日漸增多斷無延頸受戮之理彼時

豕突狼奔縱西面有兵堵禦而北東南三面何處不可遁逃其勢
又如三省教匪辦理需時那彥成受朕深恩畀以重任若老師糜
餉使賊首李文成等遁出滑城該督身家性命尙能保乎那彥成
著先傳旨嚴行申飭其請調大同鎮兵一千名道路尙近准其檄
調甘肅靖遠之兵遠不濟急不准調取日內京兵及直隸續調之
兵均已到齊那彥成務儘見在兵力相機進取速奏捷音朕惟計
日以待也○庚戌諭軍機大臣等昨因那彥成辦賊遷延降旨嚴
行申飭本日同興奏據獲賊目曹光輝供稱豫省賊匪實係李文
成爲首滑縣城中是徐安幘掌管裏約約有三千餘人李家莊屯
聚亦有二三千人李文成被強知縣拏去骸受重刑見在李家莊
養病等語計滑縣城中李家莊兩處之賊道口桃源再有屯聚總
不過萬人何以那彥成摺內云有三萬人明係屬員捏報見在帶

兵已有萬餘人以之進剿何至棘手著傳諭那彥成遵照諭旨鼓勵將領弁兵剋期進剿勿稍延緩李文成一犯係極惡首逆見因毆傷養病正可乘其不能動移設法擒獲徐安囑亦係緊要賊目若速將該二逆擒獲則賊心渙散定可一鼓殲除該二逆擒獲後若受傷不重著派侍衛等管押解京以便盡法處治用彰國憲○王子諭豫親王裕豐所屬桑垓村居住之包衣閒散陳爽等黨惡多人率先肆逆於九月十五日在紫禁城內滋事裕豐平日形同木偶毫無知覺非尋常失察可比理宜革去王爵但念此爵係裕豐高祖多鐸由軍功所封著施恩免其革爵罰親王俸十年以示懲戒將此通諭各王及貝勒貝子公等嗣後各將所屬包衣佐領人等留心稽查如有似此不守本分兇徒卽行拏報斷不可姑容隱匿○甲寅命托津赴河南督辦軍務戶部右侍郎桂芳暫在軍

機處學習行走○以海慶爲安徽按察使

由福建汀漳龍道遷

○給直隸開

州等三州縣難民兩月口糧並避難客民回籍路費○乙卯諭軍

機大臣等東省賊匪經同興督兵勦辦悉數殲除地方甯謐辦理

俱妥惟聞東省因年歲歉收兼遭賊匪焚掠災民逃避四出見聞

本境安靜有由河南江南直隸轉回者沿途甚多該民人等蕩析

離居情殊可憫著同興飭知地方官認真撫恤務使餬口有資不

致轉徙失所事定後各歸本業用副朕軫恤災民至意○丙辰訓

移居盛京諸宗室曰 世祖入關收亂定鼎京師諸王貝勒貝子

公及眾宗室隨至北京屏藩輔翼於今百七十餘年矣八旗生齒

益繁億萬黎民輻輳京邑物產昂貴此必然之勢設官分職經費

有常豈能歲增祿糈亦未能盡用宗室置滿洲蒙古漢官於閒地

封建直省其失具在前史更不必論矣胥肝殷懷迄無良策敬讀

我 皇考盛京賦 啓佑予衷以 祖宗之心爲心思惇本睦族之道莫若移居故土習我舊俗返樸還淳去奢崇儉誠良法也宗室中之明理曉事者必知感鞠謀綏厥之深恩而一二不肖者遂譌傳爲竄逐流放之重罰是不但不知尋求舊之心亦非乃祖乃父之克家良嗣矣朕志先定詢謀僉同乃命於盛京小東門外擇地建房 文學 武廟衙署成樓成備總計八十區周以垣墉聚族而居肄武習文各恭爾事長途千五百里之遙恐力有不逮特命官雇大車各付官價逐日給盤費先期備行裝下及僕役皆畀以金共用帑項萬一千有奇擇吉季秋上旬中旬分隊起程言歸故鄉欣然就道每起簡大臣照料關內外各派文武官吏護送亦可謂殫思竭慮惠我宗人矣乃有倡爲發遣之說煽惑人心者不可不闡明其理夫犯罪之人徒流軍遣律有明條未有發遣至本

省之軍犯今以衣錦還鄉之樂事轉謂斥放遷徙之虐政稍有人心者何忍出此言哉願我宗人還我故國安常處順念昔先人武備宜勤家語須熟行有餘力學於古訓此日爲家之賢子弟他年作國之好大臣拭目以俟可不勉乎○丁巳諭嗣後宮內圓明園值御門典禮內閣學士宣本大學士承旨時御前大臣及御前侍衛俱毋庸退下著爲令○諭軍機大臣等前因那彥成在衛輝遷延不進特派托津馳往督辦昨那彥成報稱在道口附近斃賊一千餘名本日復據稱屯聚道口之賊傾巢出掠官兵分頭截擊殲獲甚多那彥成接奉屢次嚴旨頗知畏懼尙有立功自贖之意見在連獲勝仗計算道口賊匪所贖無多勦淨後即可圖攻滑縣惟本日據章煦奏稱長垣東明等處賊匪復又四出焚掠賊勢甚爲猖獗馬瑜帶兵往勦恐不得力托津著先馳至馬瑜軍營認真督

辦○己未諭前因正黃旗漢軍兵丁曹幅昌從習邪教與知逆謀該管都統等均有失察之咎降旨將祿康裕瑞革去都統副都統仍加恩賞給宗室四品頂帶祿康以宗人府副理事官用裕瑞以宗人府筆帖式用茲據訊明曹幅昌之父曹綸聽從林清入教經劉四等告知逆謀尤爲收眾接應曹綸身爲都司以四品職官習教從逆實屬豬狗不如罪大惡極該管都統副都統漫無覺察其各九重祿康裕瑞著革去宗室四品頂帶副理事官筆帖式卽日俱發往盛京派令管束移居宗室各戶卽在小東門外新建公所居住永不敘用以示懲儆其該管之參領副參領佐領驍騎校等不必交兵部議處著卽拏交刑部治罪○庚申諭逆賊林清肆行叛逆其黨惡匪徒斷不能任其倖逃顯戮除惡務盡法在必伸至林清當日曾藉白洋教爲名傳徒惑眾後又勾引紅陽教之人一

同謀反此時所誅者係謀反之人至尋常習教者不過鄉愚無知
被其誘惑聞有拏送到官罪止發遣並未濫戮一人此眾所共見
共聞者凡緝捕官役以及軍民人等當知嚴拏案犯重在謀逆不
重在習教卽向來習教之人如能將逆犯呈首不但免罪亦一體
恩賞至家藏有經卷圖像不過妄希求福不知邪說異端致禍之
媒林清係傳教爲首之人見在身死族滅室家灰燼其不祥孰甚
百姓等何苦以清白之家留此凶穢之物求福乃轉以速禍其有
翻然改悟者自行首送到官當堂銷毀免其治罪列爲良民以後
再有告訐者先治告者之罪經朕此番實心苦口飭諭之後百姓
具有天良當開悟迷惑恪守王章勉副朕化民移俗至意○命直
隸屯居漢軍旗人聽州縣管轄同民人編入保甲○辛酉以直隸
籍及漢軍各科道失察林清謀逆曹綸父子從逆下部議俱降調

○壬戌兵部議奏兵部尙書福慶等前任都統失察曹綸謀逆請照例革職得旨福慶在正黃旗漢軍都統任內失察曹綸與林清商同謀逆計兩年零一箇月比祿康失察月日較久但祿康係由大學士獲咎降調後棄瑕錄用之員且曾任步軍統領漫無覺察是以降旨革職仍發往盛京福慶此次留京辦事遇九月十五日之事毫無展布朕回京召見數次辭色之間不知愧憤實屬無能無用著革職姑念未任步軍統領非棄瑕錄用之人暫免發遣德麟在副都統任內失察六箇月本應將職任世職一併革去惟念伊父福康安從前屢建軍功懋著勞績仰蒙 皇考高宗純皇帝錫封貝子身後追封郡王德麟承襲貝勒前因 天壇大祀派令視牲曠誤降爲貝子此次再將伊貝子革去則福康安舊勳幾至泯沒且福康安又無次子可以改襲朕仰體 皇考恩遇福康安

之心保全勳臣之爵仍留德麟貝子其散秩大臣並所管火器營事務全行革退賞給三等侍衛在大門上行走仍罰貝子俸十年拴住在副都統任內失察六箇月著革去總兵賞給驍騎校回旗當差

十一月甲子朔濟山東運河○那彥成勦平道口賊巢進圍滑縣○丙寅諭近來吏兵二部所定則例科條太繁動多窒礙地方文武員弁遇有應辦事件往往顧惜處分憚於舉發賢者困於成法不敢變通不肖者工於舞文巧爲規避以致積漸因循釀成鉅案國家設官分職期於得人而理其定立處分加之察劾者原以舉直錯枉俾共知儆惕無曠庶官從前立法之意私罪立予創懲公罪量爲原宥所以區分賢不肖者至爲簡當自定例屢經增改之後條目益多日趨苛細書吏因緣爲奸雖有賢能之員日望吏議

而賄祿者或以倖免於甄別人材激敘官方之道甚無益也著吏兵二部將文武處分則例公罪各條逐加詳覈凡事涉具文無關政治者一切處分奏明大加刪減務使簡而易遵信而可守賢員不致掣肘不肖者無所施其伎倆書吏不能高下其手庶地方文武各官少所牽礙得以展布謨猷盡心職守用副朕蠲滌煩苛敦崇實政之至意○諭軍機大臣等那彥成奏官兵攻克道口後直抵滑城布置圍攻先將桃源接應之賊截回滑城內賊匪出城衝撲俱經官兵擊退已將東西南三面城門堵住惟正北西北兩門尙未堵合此時緊要機宜必須四面圍定方可併力進攻切不可於西北正北兩門未合之先率行攻打致留賊匪奔竄之路賊匪突圍必係悉其精悍乘閒奔逃老弱無用棄之城中設堵合不嚴則有名賊目悉行免脫克城之後僅收復空城於大局何益乾隆

年開庫車前鑒具在慎之陝甘官兵據奏已出潼關日內即可到
營正可補北面團兵之不足那彥成等務當督率將士合圍嚴密
使賊匪無路奔逃先用大礮毀其垣壁我軍奮勇先登即可一鼓
掃蕩略遲數日朕亦不降旨飭催若滑縣之賊再行散竄則惟那
彥成是問○己巳諭九月十五日逆匪林清潛遣夥黨突入禁門
謀逆當經官兵將逆黨殲捕淨盡嗣訊據獲犯供稱是日逆犯等
在禁城滋擾時恍惚之中望見關帝神像該逆眾立時畏懼奔
竄悉就殲擒此次逆匪滋事迅卽殄除都城安堵前於孟冬朔日
蠲潔祀謝天地宗社敬酬眷佑關帝廟尙未虔申
祀謝著太常寺於冬至前諏吉在地安門外關帝廟報祀一應
禮儀卽照春秋二祀之例定期具奏請旨遣皇次子前往行禮用
答神庥○辛未給河南滑滑二縣難民兩月口糧及避難客民

回籍路費○壬申 上廷訊逆犯曹綸等磔於市○命山東截留
漕糧六萬石備賑○調陳觀爲山西布政使陳桂生爲江甯布政
使○癸酉定順天府屬州縣官歸府尹考察升調○乙亥命在京
各部院甄汰衰庸官○丙子諭軍機大臣等前日據那彥成奏訊
據獲賊供稱馮克善於八月內已往德州本日據方受疇盤獲賊
犯車德新等亦據供稱大頭目馮克善因與李文成不和見已前
往山東德州等語該逆係與李文成牛亮臣商同起事之人爲賊
中緊要頭目此次前赴德州斷非在彼潛匿必係勾結同教之人
又圖滋事德州與直隸接壤距京止六百餘里該處本有教首宋
躍蔭一犯飭拏未獲今馮克善又復潛往看來山東逆夥尙多並
聞附近州縣時有焚掠村莊之事難保無匪徒互相糾應不可不
加意防範同興駐紮曹州著卽迅速遴派文武幹員星夜馳赴德

州嚴查馮克善及宋躍濫蹤迹務得切實下落設法擒獲○丁丑

托津奏剿滅開州賊匪得旨嘉獎與馬瑜等下部議敘○戊寅以

文孚齊布森俱為內閣學士

文孚由二等侍衛齊布森由光祿寺卿

俱為左副都御史

扎拉芬由通政使蔣予藩由宗人府府丞遷

○己卯命直省督撫舉

劾道府以下官○庚辰諭前日據鐵保奏籌議經費一摺內稱伊

曾任督撫有年願照兩江總督俸廉一年之數捐銀一萬八千兩

以盡蟻忱鐵保久膺外任養廉優厚以祿入所餘還輸公用伊前

因南河興辦要工認繳養廉銀四萬兩曾准其解交河庫此次復

因積有餘貲請再繳還總督一年養廉事同一例是以准其交納

部庫至其所請令京外各員量力報效之處見交該部覈議乃本

日鄭親王烏爾恭阿奏稱伊見教匪滋事國用浩繁請扣親王俸

二年歸入軍需應用等語所奏殊屬無謂國家仰承 昊佑幹運

盈虛雖有戎事出入度支從無缺乏從前辦理三省邪匪七年之久餉銀用至八千萬兩悉由帑藏頒發從未令臣工輸助彼時王公大臣亦未有奏請者此次勦捕滑縣賊匪地止一隅師行兩月連奏捷音餘匪嬰城已如釜魚檻獸計日即可克復縱或駐師接捕經理善後事○臘底春初定可全師凱撤軍需支發無多不須廣爲籌畫今烏爾恭阿倡爲此舉設王公大臣等紛紛效尤籲懇捐輸成何政體所請不准行諸王大臣與國休戚相關但當竭忠盡力於職守所在實心整飭能使綱紀修明中外肅父上以感召天和豐登屢告下以綏安黎庶奸宄不興數年之閒家給人足國用日充所獲多矣正不必貢獻輸忱始稱忠蓋也布告在廷咸喻朕意○甲申李文成奔輝縣之司寨山那彥成分兵躡之○乙酉申命直省各督撫甄別藩臬以下官○賑山東曹州府濟甯州被

賊難民○丙戌申嚴誣告叛逆之禁○丁亥以明亮爲戶部尙書
○調景安爲左都御史和世泰爲理藩院尙書○戊子諭那彥成
奏官兵截剿輝縣竄匪全數殄滅殲斃逆首李文成及賊首劉帽
明一招所辦可嘉之至本年九月十五日之事逆首林清與李文
成二人內外勾結約定同日起事適李文成在原籍滑縣強克捷
訪拏刑訊其黨與見事已敗露不能待九月十五日之期卽劫獄
戕官揭竿倡亂林清在京謀逆外援不至迅就捕誅而李文成在
豫省指揮逆黨四出焚劫直隸長垣東明山東定陶曹縣等處同
時竄起戕害生靈經朕簡派領兵大員調集數萬官兵會同剿捕
該逆李文成潛伏滑城見官兵逆獲勝仗於未經合圍之先賊黨
劉帽明等乘夜將該逆擁護出城另糾夥眾數千人由封邱延津
修武竄至輝縣希圖入山奔逸若使遂其奸謀則滋蔓難圖朕之

良民受其荼毒者又不知幾千萬人正在廬念適朕前派之吉林黑龍江馬隊官兵星馳到豫那彥成等派令德甯阿色爾袞帶領追至輝縣司寨山中殲戮賊匪二千餘人首逆李文成率同賊目劉幗明等數百人負隅死守本日接那彥成六百里加緊奏報德甯阿楊芳等統率滿漢官兵奮力攻擊不避槍石拆毀寨牆一擁而登生擒逆匪二百餘名李文成避入樓房楊芳特依順保色爾袞德甯阿率眾直入該逆等無可逃避劉幗明自稱其名持刀躍出被官兵用槍擊斃李文成亦對眾稱名舉火自焚被官兵搶出業已壓斃查驗屍身刑傷痕迹顯然其餘賊目及從逆夥黨五六百名全行殲戮並無一名漏網實足以彰國愍而快人心該將領及滿漢官兵等倍常奮勇宜加優獎色爾袞德甯阿著加恩各賞加都統銜楊芳特依順保著加恩各賞加提督銜卽先換一品

頂帶該四員仍俱賞給雲騎尉世職其本有世職者准其再兼一雲騎尉乾清門三等侍衛伊勒通阿身受六傷實勇力戰著加恩超升爲乾清門頭等侍衛仍給勁勇巴圖魯名號再加賞四喜玉搬指一箇花大荷包一對小荷包兩箇又發去玉柄小刀十把砬礮翎管十箇瓷翎管十箇瓷搬指套十箇分賞出力官弁一兩重銀鏢二百箇五錢重銀鏢二百箇一兩重銀牌一百面五錢重銀牌一百面分賞出力兵丁仍著那彥成等秉公查明官弁兵丁內奮勇出力應行獎擢者據實保奏候朕施恩陣亡之吉林委參領福林德著加恩照參領例賜卹逆首李文成著於剐屍後傳首河南直隸山東滋事地方示眾劉暢明亦著剐屍梟示其餘擒獲賊目韓德眾等審明卽於該處正法此股竄匪洗蕩淨盡殲厥渠魁滑城長圍已合餘賊聞風喪膽著那彥成等迅速進攻佇候捷音

再加懋賞將此通諭中外知之○諭軍機大臣等據同興奏拏獲逆黨宋躍澂訊供逆首馮克善從滑縣走出於十一月初十日到該犯家中十五日該犯送至景州由獲鹿前赴山西等語該逆馮克善甫於十一月十五日自景州起身前赴山西由直隸境內行走計尙未能遠颺該署督迅飭各屬按照所供年貌密爲查拏逆首李文成劉綱明等俱已殲斃滑城指日克復惟查拏潛逸匪徒最關緊要所有著名逸犯徐安輜牛亮臣等見在滑城困守此外馮克善一犯卽係最要逆目該督當督飭地方文武員弁認真緝捕如能弋獲必將獲犯之人優予恩施勉之毋怠將此傳諭章照知之○庚寅諭逆賊林清與李文成二人互相勾結倡首作亂李文成曾兩次到京與林清而訂於本年九月十五日起事屆時李文成由豫省帶領匪徒數百人來京接應適滑縣知縣強克捷訪

知李文成謀逆於九月初間將該逆擊獲到案刑夾收禁賊黨馮克善等因謀救首逆遂聚集徒黨於初七日入城劫獄並突入縣署將強克捷全家戕害彼時李文成徒眾已在本籍搆亂遂不及分派賊黨進京林清不知外援已絕仍守株坐待旋經捕獲立正刑誅李文成雖一時免脫究因傷重不能步履在滑城潛伏迫後官兵屢勝賊黨劉綱明等於未經合圍之先將該逆擁護出城乘坐大車沿途逃避究因帶傷不能遠逸旬餘之久僅逃至距滑城二百餘里之司寨官軍星馳追及立予殄滅檢驗屍身傷痕宛在林清李文成二首逆因未遂其會合奸謀是以先後授首易於拉朽今全師告捷追思強克捷首破逆謀厥功甚大而全家慘遭荼毒尤堪矜憫前曾降旨將該員照例賜卹尙不足以旌其死事之忠強克捷著加恩照知府例賜卹並著入祀京師昭忠祠交該撫

查明伊尙有無遺嗣著於服滿承襲世職送部引見以示酬獎忠
勳恩施優渥之意

十二月丙申予河南封邱等七縣被賊難民口糧○戊戌諭國家
求治之道所寶惟賢公孤卿尹朕自勤加甄別至百僚庶司勢難
徧觀盡識惟在大臣推賢讓能方合以人事君之義見當整飭紀
綱之時尤當博選賢能共襄治理著通諭滿漢文武一二品大臣
各舉所知必灼見爲才品卓越有守有爲者密疏所長登之薦牘
古人內舉不避親外舉不避仇果其有裨於國家卽屬親故俱不
必存避嫌之心朕觀其所舉益可收明目達聰之效該大臣等務
各稟公忠薦賢爲國用副朕登崇俊良至意○諭據欽天監奏正
陽橋護城河水周流環繞直達通潞合之正陽門永定門南北方
位正協水火旣濟之義今天橋南河沿六處閱年漸久泥土半淤

審度地勢似涉水火相爭應請將兩岸積土趁勢填實等語正陽門就外城形勢而論地居坎位永定門在其南地居離位正陽橋近北導引河流委輸通路恭讀 皇考高宗純皇帝聖製正陽橋疏渠記本取坎離既濟之義辨方正位鞏固皇圖彼時司工官未喻 聖意遂宅河泊六處我 皇考以成事不說故不待請而爲之記茲正陽橋一帶護城河渠浮沙淤墊亟宜疏濬以達流泉其天橋迤南河泊六處該監審度象涉水火相爭與 聖製文協坎以享既濟本義殊不符合其地依形家言爲都明堂法宜坦平正直今凸凹參差於 郊壇左右觀瞻亦覺不肅著照欽天監所請交步軍統領衙門卽用兩岸積土將河泊六處一律培墊以大和會而昭蕩平敬述 聖製文奠經涂以登皇圖本義該衙門卽擇吉辦理○諭軍機大臣等新疆南北兩路自乾隆年開闢以來

設立駐防以資控馭地方遼闊道路遙遠各路卡倫驛站繁費在所不免從前新疆經費係由內地撥解備用歲以爲常原難一時裁減惟思巴里坤烏嚕木齊已列爲郡縣南路各城回民歲輸貢賦亦比於齊民大率與內地無異其伊犁塔爾巴哈台兵丁亦多給與屯田該處自平定以來五十餘年人民日聚土地日闢今昔情形不同因時制宜亦宜量加裁定舊傳論松筠長齡將新疆南北各城及鎮西迪化二府州所屬每年出納大數通盤覈計其地利所產人力所生是否歲有增益不須取資內地者約有若干卽不以該處歲入給與該處之用但使經費咸有所減則於國用不無稍裨此事關係甚大總在松筠等公忠體國實心擘畫務爲經久無弊之策朕亦不責以近功速效也○辛丑申禁民間聚賭結會○以東三省官兵技藝優嫻命五年一次挑送京營○壬寅以

直隸獻縣捕獲馮克善加章煦太子太保擢知縣張翔爲知府○
撥兩淮鹽課一百二十萬兩備河南軍需○甲辰詔獎直隸等三
省團練義勇及防護各地方紳士耆民○乙巳陝西岐山縣三才
峽匪徒萬五等聚眾滋事命長齡勦之○丙午那彥成奏攻克滑
城賊渠宋元成劉宗順馮相林伏誅牛亮臣徐安輞王道瀼就擒
諭那彥成等田六百里加緊馳奏督率官兵攻克滑城一摺覽奏
欣慰此次逆匪勾結起事始於滑縣將官劫獄占據縣城其夥黨
在直隸山東邊境者亦同時竊發擾害城鎮鄉村居民被其荼毒
節經派調官兵分路進剿山東曹定等處賊匪早經撲滅直隸開
州長垣一帶亦就地埽除其豫省大股賊匪先經那彥成等將道
口桃源屯踞之賊次第攻克其時逆首李文成率領匪眾竄至輝
縣司寨地方經楊芳等帶兵殲斃兇渠蕩除餘孽惟占踞滑城賊

匪負隅抗拒圍攻已越四旬見經那彥成等周環布置於本月初十日親督兵勇奮力進攻城南地雷轟發震裂牆垣數十丈那彥成督同楊芳桑吉斯塔爾冒煙攻上左首楊遇春等攻上右首城西地雷繼發官兵雲梯齊上城垛高杞同馬元等帶兵進攻谷門分投繼進殲斃賊匪三四千人賊眾突圍逃竄又被官兵殲斃四五千人生擒賊匪二千餘人救出難民老幼男婦二萬餘人全城克復此皆仰賴 上天 祖 考垂佑深恩得以埽除逆惡迅奏成功朕與天下臣民同深慶幸那彥成高杞楊遇春統領師干不辭艱瘁其在事將領官兵等亦俱奮勇出力允宜渥沛恩施以昭懋獎那彥成著加太子太保銜賞給三等子爵換戴雙眼花翎在紫禁城內騎馬並賞給御用荷包一箇升授伊子容照爲乾清門二等侍衛所賞荷包翎支卽著容照馳驛齎往又賞給黃面黑狐

皮馬褂一件四喜玉搬指一箇吉祥白玉牌一箇鑲寶石帶扣一
副黃辦大荷包一對小荷包二箇高杞著賞給頭等輕車都尉在
紫禁城內騎馬並賞給黃面烏雲豹皮馬褂一件四喜玉搬指一
箇鑲寶石帶扣一副黃辦大荷包一對小荷包二箇楊遇春著賞
給二等男爵紫禁城內騎馬並賞給黃面天馬皮馬褂一件四喜
玉搬指一箇鑲寶石帶扣一副黃辦大荷包一對小荷包二箇桑
吉斯塔爾隨那彥成率先登城著加恩在御前侍衛上行走其摺
內圈出各員除那彥成楊遇春高杞外凡攻城出力者俱著交部
從優議敘兵丁賞給一月錢糧圍城各官弁俱著交部議敘兵丁
賞給半月錢糧並發去四喜玉搬指十箇玉柄小刀十把花瓷翎
管十箇玻璃鼻煙壺五箇瓷鼻煙壺五箇一兩重銀牌二百面五
錢重銀牌二百面分賞出力兵丁自九月十二日以後直隸豫東

等省軍報絡繹並有突入禁門逆案軍機大臣等晝夜宣勞除勒保病假在家近甫銷假入直外董誥盧蔭溥著交部從優議敘桂芳自托津出差派令入直奉職克勤著即在軍機大臣上行走仍交部議敘松筠曹振鏞職任綸扉俱著加恩晉加太子太保銜劉鐸之英和督緝認真俱著加恩賞加太子少保銜百齡同興辦理防勦事宜奮勉出力俱著加恩賞加太子少保銜軍機章京通政使司參議姚祖同著交部從優議敘此外各章京著軍機大臣查明尤爲出力者保奏數員交部從優議敘其餘各員並著交部議敘所有此次議敘各員均照軍功例議給○諭軍機大臣等那彥成此次克復滑城將首逆按名生擒辦理實屬完善見交廣厚慶祥管帶京營官兵押解牛亮臣徐安惻二犯來京所辦甚是至陝西飢民滋事一節昨降旨令高杞等同富僧德等帶領西安滿兵

並著帶陝甘官兵迅速前往交長齡勦辦今那彥成得信後已派
富僧德隨高杞至潼關探聽消息並將西安蘭州固原各官兵次
第撤動密屬楊遇春押後行走甚合機宜至山西大同官兵本非
勁旅無庸派往卽著張績等帶領歸伍滑城破後直隸山東一帶
人心未定尙須重兵彈壓所有直隸官兵止可擇其不甚得力者
先撤回十分之三東省防兵並知會同興酌量撤回一半俟接捕
淨盡再行全撤克城之際民賊涸涸殲斃賊匪一萬七八千人燒
斃賊匪七八千人豈無難民在內則救出難民二萬餘人亦豈無
賊匪在內此時不可濫殺一人亦不可倖免一賊若不認真辨察
儻著名兇悍之賊一經漏網將來餘孽復萌關繫非淺那彥成不
可憚煩先將生擒賊匪二千名逐一審出名姓住址並將殲斃賊
屍詳加驗認查點飭拏之賊目何人在內何人未獲其難民二萬

餘眾該督派精細之員逐名查訊實無賊匪溷迹其中再行釋放其滑城內偏僻處所並地窖枯井均逐細搜查此內賊匪藏匿者固多恐良民亦所不免詳細分別勿令玉石溷淆此後善後事宜最關緊要該督總遵照前旨留彼駐紮緝匪俟滑城附近地方悉臻甯謐再移營大名以次順赴山東聊城一帶查看各處情形均可放心再奏明候旨回京復命○命吳璥赴東河查勘湖河事宜○庚戌以徵瑞爲工部右侍郎曲總督內務府大臣遷○山東教匪首逆朱成貴伏誅○癸丑以岐山縣賊勢漸張命楊遇春率吉林黑龍江兵往剿之○戊午免河南被賊滋擾之滑濟二縣新舊額賦○是歲朝鮮琉球暹羅越南入貢○會計天下民穀數各省通共大小男婦三萬三千六百四十五萬一千六百七十二名口各省通共存倉米穀三千三百七十萬四千四百六十八石二斗七合七勺